



歇菴集卷之十五

皇明朝列大夫國子監祭酒會稽陶望齡 著

門生喬時敏校友

謝伯美 弟 陶爽齡 訂

商 濬 陶祖齡 閱

譜傳

姓系第一

陶之先譜異其說風俗通曰氏於事則巫卜匠陶
唐柳沖鄭樵祖之而陶氏夷於工技晉徵士潛咏
其祖德自大司馬泝於愍侯以及於陶唐蓋所謂

神明之胄也而論者儕諸巫匠之間將何徵哉於戲左戶所藏族篇所載信而滋誣修舉而滋濫自譜學明備之日而訛誤甚矣況於後世乎鄭樵氏之類姓也三十有二陶氏居五焉而專曰以技氏予不解也樵注曰陶唐之後因氏焉此國氏也又曰虞思爲周陶正亦爲陶氏此官氏也又曰遂人之族分而爲四商人之族分而爲七七族有陶此族氏也陶叔爲周司徒後爲陶叔氏此以先祖之名氏也然則陶之有五莫適定也傳曰自虞而上

爲陶唐氏在夏爲御龍氏在商爲豕韋氏在周爲唐杜氏在晉爲范氏以系堯陶本而范支氏族書曰舜陶於河濱其子孫遂爲甄氏以系舜則陶直而甄迂於戲民之生久矣吾何徵哉其義正其得姓先以國以官庶幾近之吾其唐虞之胤與愍侯開國丞相青大其世降是而顯名者漢徐州牧謙晉大司馬長沙桓公侃謙居丹陽侃居潯陽故其後遂有丹陽潯陽之望瞻輿淡潛唐之峴宋之節夫潯陽之裔也璜回子鏘弘景季直丹陽之派也

於戲吾之先其爲潯陽與卜陽與莫適定也吾所知者始祖宗陽公宗陽公而上名行可得而傳者國寧信八二公而止矣宗陽公始居陶家堰堰遷自陶家坊坊遷自台於戲再遷之蹟吾疑焉故著其說於後篇又況二陽之望五類之氏吾何以知其然哉詳邇而略遠信信而疑疑譜之道也

地望第二

陶氏所居鑑湖洲潭地漢永和間太守馬臻始築湖防水灌田防首尾二江袤百三十里爲堰二十

有五名陶者一湖水西南穴城入樹堤遮之曰西陶家堰東去城四十里居茅洋瓜山間之間曰東陶家堰堰之先其有陶姓者聚族於是乎姓先於湖與世更人易而各從之皆不可知然其爲漢唐著姓支庶繁碩徧於州之東西湖之崖澨可逆而睹也東堰至今別有陶氏居堰北稱堰下陶而吾祖宗陽公以勝國時來居堰南渚間蓋曩者菱苳所都帆檣所馳至宋中葉防壞湖落而後洲澤出焉稍耕爲汗菜室爲瓜牛蕩滿葑蕀千有餘歲而

後復爲人居其風氣宜有鬱而將發者矣而形家者言地脈從箬蕢山伏行水中若龜魚浮沉藕斷絲續行三十里而後亘爲五洲縱四橫一縱若辯橫若蒂如夫渠華云其信然乎後枕廣野負賀池而帶巨海左爲越嶺諸山若列屨然一峯齒然出於震曰稷其南則湖水之所滙也衆山之所攔揖也諸山勢飛舞遇若止立白塔之浸最廣至是迫束若壺罌之頸然宜亦樂幽勝者之所居也相傳宗陽公之始來也蓋憚而宅之然地陘隘所居徒數百畊無以畜衆而象形爲浮木乘木大川所任鍾石耳易曰地勢坤君子以厚德載物吾之先蓋世有淳固故子孫藉之厥指巨千影纓垂組者前後數十輩命氏以來庶幾稱盛其祖考之厚德與棄德恃地其誰能載之哉先兄德望有同年生新安程子鈇來爲杭州府推官行部至越爲予兄弟言其先世善言地理賈於會稽還謂其孥曰吾買地某所法當富貴將徙而家焉其室人難之乃止其各形卽吾之先廬也然程亦世顯於徽抑其澤固

能昌後無煩於去就乎將地之居人亦有緣會爲之邪

始遷第三

遷始宗陽公此堰南之陶之始也非堰始也堰之陶久矣在邑曰東西陶坊瀕水曰東西陶堰吾陶之自坊而堰台而坊也此狀莊敏者之詞也詞曰陶系潯陽方唐季世潯陽之裔有爲台守者以世亂家焉後徙越居陶家坊由坊居鄉自宗陽先生始宗陽以至莊敏六世矣莊敏之先以隧心得銘

者凡七八公無是語也樂淳松菊之志曰華胤右族而已志素菴曰宋以來代有顯者郡城名其坊郭外各其堰坊堰對互之稱耳人代遷徙無稽焉之宜黃浮梁也原本堰湖若謂族姓旣緬世世居焉者坊堰之繇遷且不可考而況於台乎吾聞諸父兄石城公游於黃巖得長潭譜焉長潭之耆老曰若吾派也以爲信然旣以譜歸族人遂用其說故莊敏而後凡家狀皆系於台吾父吾祖猶因之望齡又嘗爲文贈姚安鄉進士不退以爲長潭種信

也及受命撰次遺牒而疑之既求台譜驗視而其
文多荒謬當其派季其世十三其第三圖曰吾老
三子仲曰棟遷紹興而贅以文曰一名國寧然後
知傳會之蹟明甚又考舊傳曰國寧府君世居郡
城之陶家坊一以爲始遷一以爲世居而前譜兼
用之誣又甚矣陶氏初譜相傳爲郡博翁公好古
所著仲淵公被法二孫黼黻攜以他適譜隨以亡
後得斷簡篋中有云系出長沙族分台越而遂援
以爲台遷之證不知台越語勢亦對互之稱耳夫
大江始源其濫觴惟岷山之人知之揚瀾左蠡而
下抑已疎矣孔子曰如用之則吾從先進故吾於
譜從七志焉七志多疑詞從之所以傳疑傳疑焉
所以信也

派別第四

越俗好游陶氏獨少出重遷游又輒困工賈史胥
之業皆無所事而專其力於儒蓋古所謂士鄉與
土堯人貧相守而不去更二百餘禩徙不出鄉故
靡得而紀焉其先獨宗陽公之兄幸四居陶家埭

子孫世世通慶弔他不可考長老言居郡學前者
陶坊之餘胤也其先有學博君惟敬惟敬之言曰
陶堰吾宗也雖然彼方貴盛吾素士無為援之惟
吾族人亦以為然而譜軼亡據不可合比惟敬孫
唼與予同業相好嘗以其譜示予其先祖亦幸第
也幸之前所載尚十餘世多行而不名又行稱猥
鄙真贗不可辨而四方之陶其先往往有幸第方
伯公言嘉靖間星子梁尚書尚德上疏復陶姓疏
稱其祖行亦爾閭樵李王江涇之譜又有之幸僻

也何其多同哉今堰南同居之人吾譜已有不
詳者而強膠遠附義所不取聊志所聞見而已
諺曰母如花接者佳姑務親親以衛其本乎
世表第五

蘇明允曰譜為親設也故詳近而略遠其克齋公
之義乎功總而降略矣予踵成事者也其略弗敢
詳其詳弗敢略例遵而義廣予以族譜者乎初表
以六世後遞以五終始於三樂也陶至三樂而後
大

世傳第六

幸五府君諱嶽字宗陽幸五其行父信八府君祖國寧府君事軼俱不可詳也幸五府君始居會稽陶家堰之南渚生於元世醜夷德隱居不仕善言堪輿自放山水之間望齡始聞諸長者宗楊蓋其號楊為陽訛也有敏師者故宋臣也宋亡逃諸浮圖自詭為相墓者術奇祕弟子楊生盡傳其法稱楊宗敏而府君師楊稱宗楊表厥自云嘗遊台剡三吳間相傳錢塘江學士祖阡

及新昌俞尚書家祥樟墓

俞氏阡與石氏靈柩並稱故名祥樟

宗

陽先生所相也後予至新昌而同年生俞君為道其先世事語皆符合元有天下華士之芳潔者視其朝若鮑肆不可嚮邇而敏師宋逋臣毀服薙頂竄走山谷義猶較然府君從其徒游蓋醜元也

山長府君諱義行昌三幸五府君第三子也當元季以行業推擇署鷺洲書院山長無何請罷還明興例改開良官 詔徵不起與同郡侍制趙

公倣翰林應奉夏公秦亨二王公萊山好問爲
文酒之游汎舟賦答人稱爲高士

菊莊府君諱仲濂行純四山長府君長子也材敏
多通少游其父友經史淹博至正丁未避兵郡
城時唐先生之淳館長春觀名士雲從之門闕
甚峻府君攝衣通謁深見禮異遂留居講肄名
冠舍中國初罔密民間貲高者動輒扞文而府
君以詳雅善諧物鄉黨愛敬之卒全其家

端菴公諱裕字宗問精悍有氣岸鄉里多嚴憚之
討費墅盜也公率家人先進賊拒巷戰爲所得
繫髮於闔以姬守之將推刃焉公給姬得脫走
乃多爲策畫賊皆就擒

畊樂公諱祥字宗吉一號泰菴魁梧質重篤倫理
兄端菴公嚴介難弟公益務恭謹雖分異事必
諮稟而後行至拊接羣弟藹如也爲鄉賦長區
民感服歿後咸思之

松菊公諱壽一名澤字宗澤以孫恩贈兵部侍郎
好學勵行嗜吟詠興至揮染詞翰並美兄弟友

愛更讓資產姊死拊其孤擇壻厚嫁其女有閭
百戶者以告身質錢沒不能償召其子歸之嘗
題所居曰兄孫心上影天道暗中燈因吾子孫
當有顯者晚病暗久之忽強起肯首作呼召狀
子孫驟集手畫積善二字於左掌遂卒子性慥
愷

素菴公諱瑀字宗佩醇雅夷易喪父哀毀事兄甚
恭親所嗜雖沒常以時薦每得佳味必先奉兄
未嘗敢先食也好施拯難如不及有墅在東臯

題曰愛吾廬云子懌

東臯府君諱璇字宗玉大父庸齋府君表其阡曰
管歐陽文忠父沒之日尚在襁褓後六十年名
位旣盛始表其阡曰非敢後也蓋有待也奎非
敢望公者以曾祖考東臯府君善行無紀竊有
比焉爾君身為布衣善稱鄉黨耆年賜爵予童
時府君命名曰良善欲世世子孫式穀似之比
有知見府君軀體頎然容貌毅然立行挺然修
髯洪欬心直行端為宗長宗人無外內皆知敬

信以至鄉黨盡然所重賓祭每日必焚香拜禮
祠下四時之祭昭穆咸在見府君盡誠莫敢不
虔時省先塋護封樹兄一兄之子五府君終身
親睦至今數世尚因仍不衰母丁安人出自同
邑故族性行純謹克宐厥家蓋善不在大亦不
在小惟其積之爾然有身積而成人者有世積而
成人者文忠之父仁政及物身積之慶遂鍾其子
理固宜然如府君上承父祖下訓子孫雖數世
隱德兩葉儒官於人不能有濟而善以世積亦
庶幾成矣時不可後姑述見聞以傳永久儻後
有如文忠者出更爲藻揚可也子悰

微軒公諱著字微之端菴公長子性果毅博淹經
史街市衆諄數言立剖歲饑蠲賑罔恡里中盜
起協謀於父盡翦平之弟博

龍巖公諱博字約之號約軒以明經知龍巖縣剽
斷明允城土庠惡公甕之爲堅壁嘗禱雨而澍
邑人爲詞歌焉後弟懌僉憲福建行部至其邑
民聚觀曰此明府弟也依然懷思之不能去弟

慧

雅軒公諱慧字敏之性通敏從龍巖公講肄業成
矣屬家有里役歎曰奈何爲父兄累乃罷業身
任之嘗與兄子瓚共出錢貸人後有負者曰寧
負我無負吾姪至析箸悉推其私產共分之家
廟燬於火祀事漸廢賴公復興

方軒公諱恕字勗之耕樂公長子性和厚強記博
識尤精諸史楷書有晉人法以名行賓於鄉飲
爲族長嚴重子姓趨前不敢仰視弟慵

易安公諱慵字潤之恭讓詳雅嗜讀書於群從中
尤號儉樸子孫至今師之弟忠

琴月公諱忠字本之喜讀書善鼓琴每月夕撫絃
歌詩襟韻蕭遠顏其居曰琴月軒一時詞人多
歌詠之

復齋公諱性字復之松菊公長子幼而英特占對
甚敏同邑僉憲季公駿長於春秋公年十三從
之游盡得其精義陶氏以春秋專門自公始也
爲諸生每試常冠成化乙酉以其經魁選文鏤

版爲式七試春官不第卒子諮

實齋公諱慥字實之一號竹軒松菊公次子以子
貴封工科給事中贈兵部左侍郎性慈仁嘗責
租佃家值空匱閔之與約曰再稔輸我旣而察
其老稚有饑色憐然曰吾舟幸有粟姑分取之
乎其家感泣公亦泣悉所載與之以空舟歸語
章淑人曰佃某貧若此淑人曰曷能不相卹邪
公曰然夫婦好行其德如此嘗爲新舟其女弟
歸見之譽其美公曰吾妹欲之邪舟未有憤憤
成以與妹旣憤曰不可以空往也刈禾載而遺
之其友愛類此僕有盜者公知之弗言徐以他
故遣去淑人見乞兒至與飯必令炊熱以少蔬
菜置飯上祝曰使吾子孫錦上添花也子誥諤
諧講

孝義公諱愷字徽之號梅軒工文能詩兼精醫理
神情灑然宗人稱之曰孝子義士卒也遂私謚
爲孝義公後以子譜恩 贈霸州判官譜與弟
訥俱知名

參議公諱懌字習之號克齋素菴公長子幼穎慧日誦數千言八歲賦僧舍秋園圖詩及詠新柳聞者奇之長博物多聞慷慨有遠略弘治庚戌舉進士授刑部主事寬平不阿戚里殺人同官欲釋之公持曰法公器可爲勢刃邪有獄卒年十九犯法以積姦論戍公爭曰豈有年十九名爲積姦者遂得末減出爲福建僉事遷廣東參議所至多惠愛時奄瑾亂政官以賂進公恥之授劾歸悉散俸錢舅弟餘逮戚族遇凶歲輒蠲租不取譜牒散亡公蒐采彙輯之又爲家約數十條并諭族文一篇陶氏登進士第自公始嘉靖間祀鄉賢有克齋稿藏於家

易直公諱恂字修之參議公弟也倜儻好義嘗倒橐濟人所交友多一時名士子詩少慧公訓厲甚苦每雞鳴燃燈至塾舍起日起起後以明經起家

繹軒公諱懷字繹之游邑庠爲增廣生連試不利時執政有所善友老而貧謂執政曰子貴極中

朝而吾老衿佩乎其人亦增廣生也執政心憐
之會艸 恩詔遂創令是歲郡縣儒學常貢外
增廣生又次連試五科以上者予貢以爲友地
公與例合遂中選授豐城縣丞攝令月餘政煩
民訛而能洗手奉職入覲遘疾卒邸中季弟情
逸軒公諱情字節之兄憲早卒公奉嫠嫂拊孤姪
具有恩禮宗黨稱爲友悌

介菴府君諱愨字誠之東臯府君子美丰儀善談
性行挺挺言動悉依禮法亦用以格物人有
過謬誚讓無所隱雖得怨招侮不能易也個儻
不事事平居歌詩奕棋而已從姪莊敏公甚敬
之沒爲之志墓子試誣

砥齋公諱璜字世用少慧早夭配顏二十八而寡
二子穉弱泣血茹苦足不踰戶宗黨稱爲完節
年八十乃卒

重齋公諱珊字世澤累以儒士應試弘治乙卯南
川公以春秋舉第一葛山公亞之次開卷得公
主司相謂曰麟經舉額幾何陶氏舉其三乎遂

罷之

宐黃公諱諮字世臣號蓮塘與從弟諮同舉於鄉
力學有精思嘗發明春秋大義數十條稱爲名
家選知宐黃縣俗獷悍阻險善逋賦公鑄諭誠
惻民皆樂輸然鄰邑豪右占籍者猶扞令弗供
公曰賦自田出令問佃者由是歲輸爭先罔敢
後矣三年民益親附莊敏以直諫落職公亦罷
歸平生寡言重諾外疎中通遇族姻以恩禮至
其卹諸甥厚嫁甥女人尤難之嘗營墅丁山自
課耕斂田悉倍穫所樹松數千森結成列配沈
通經書嘗剜臂療父及事其姑與王舅備極孝
養王舅老以銅鎗遺之曰以志汝孝也

浮梁公諱誥字世榮號東洲性坦率樂易領成化
丙午鄉薦尹浮梁銳敏有爲民甚賴之未滿卽
解歸起墅於東洲鑿池跨梁植花木觴咏酣適
輒呼曰天壤逸人東洲子邪有田有穡祖父遺
之有勲有業兄弟成之東洲東洲孰與爾逸乎
書其語寄南川公時南川公方宦達而公志在

幽隱人比之彭澤

石城公諱諤字世直號鯁齋強學過人幼時日受書三行誦至夜分不伏亦終身不忘也弘治辛酉舉於鄉授樂平知縣寧藩之變義師起公先率兵應之後改石城縣山邑頑陋公用禮教濯劇之稍稍向化焉公於舉子業尤號精熟罷歸日與羣從談說經指授者皆有程度

莊敏公諱諧字世和號南川少英特有大志年二十二督學胡公試而奇之攜歷數郡雜諸士試無踰者畢校御史問茲秋省元當屬誰乎胡公故度語對曰姚生也及試啓解牘公爲第一人御史難曰公言姚生何陶也對曰臯陶之陶耳明年弘治丙辰舉進士選翰林庶吉士授工科給事中時鎮守太監劉雲董讓各上章誣讎大吏公請峻罰以存國體詔允之著爲令轉右給事中以父艱歸起復當武廟初闈宦導上游獵浹旬不止會風雹拔社木飄殿瓦公上疏極言斥瑾聚永成罪乞敕閣臣詰問數其

辜告於先帝之靈治之以法迴聖慮戒佚
游勤講讀以弭天變時又遣中官往江南抽運
木植公力爭之有詔罷遣又諫止不急工作
及差官賣鹽織造皆指切瑾輩瑾等切齒銜之
至書姓名壁間旋撫他事中之杖爲民又指與
大學士劉公健謝公遷及名士五十三人爲黨
錮之憾未已又駕言巡視十庫時乏御用物械
至京下錦衣獄廷杖謫戍肅州至肅與尚書劉
公大夏潘公藩爲唱和之友所著牧羊臺賦蘆

鴈橫塘詩稱於時瑾誅放還嘉靖改元召復原
官未至陞江西按察司僉事豐城雷煥九者爲
盜所引當死以寃走訴公匿煥九雜諸隸中而
召羣盜令識之盜皆茫然明日復鞫之誠曰有
跂而門闕者執以入旣入盜叩頭吐實曰是賄
我又二商遠歸其一人過舊館止食不反及推
按館人不服館有鸚鵡鳥能言公使詰鳥鳥言
積灰處啓灰得屍事遂白咸以爲神踰年轉河
南河防道副使故事以土牛湮水儲待麻芻費

不訾公令瀕河植長茭細柳伐條枚代芻而令
罪人輸麻以贖料具財省法徧行河上歲省費
十餘萬渡者窻客中流旣登岸則不識主名無
所訴公使舟刻鳥獸形令得指形以訴官今天
下津渡多刻鳥獸自公始擢本省叅政太行賊
陳卿爲亂梁晉會勦公陰畫奇計先師未進以
奇兵擣之遂擒卿遷右布政使尋轉左逾月擢
副都御史提督南贛軍務居一歲陞兵部侍郎
總督兩廣先是廣盜充斥嶺海至僭號署官積
不能平公圖謂海賊飄忽欲先誅絕之乃大作
艦於番禺海濱以誘致賊賊果焚舟伏起奔
破溺死過半殺賊謀主降其酋許折桂得丁壯
千八百有奇分遣之遂出師潯州破石馬仙臺
諸山寨斬酋雷公招進兵東西山四路竝擊覆
巢俘斬名賊甚衆平其地置戍而還又戡瓊州
黎勦七山遂攻大帽揚旗殺僞無敵王文興隆
先是大帽揚旗之賊據絕險毒矢飛石兵不可
近公選銳卒二百婦人服挾兵縕火夜援藤上

樹熾震砲焚廬舍艸木大兵噪山下應之賊驚潰相蹂擊遂盡破滅公用兵機慮沉密師所向雖左右不知嶺表言捕寇功推爲多然無中助賚止金幣而已以母憂歸服闋起貳本兵入議朝事侃侃自盡頗迂權貴辛丑九廟災自陳遂得請年七十三卒訃聞遣官祭葬贈兵部尚書隆慶元年有司上公行誼勳烈追謚莊敏公弘毅開朗言行終始皆可覆也性好誦讀爲文博厚莊嚴詩宗盛唐書有晉法所著有奏議若干卷河南南贛兩廣經略事宜若干卷西行漫稿及贈遺集若干卷

金谿公諱講字世明號葛峯少游邑庠以學行自砥應例入太學選主龍溪簿政近民民不忍欺事上簡直而官譽日起踰歲持母服歸邑人爲立碑頌德補金谿部運南都事竣徑身歸鑑湖而遣僮持牒詣邑請免金谿令質僮馳檄勸迎之公爲勉行居無何求去愈力旣歸日與宗人談飲爲樂意條如也孫大年成進士每歸省公

身者集 卷之十五
庭立訓正之中懷豁然與人交急患抹過人服其誠焉

高陽公諱譜字世芳號繼齋孝義公子博洽美詞翰以諸生例貢游京師時有國慶羣公卿賡和昌字韻詩公詩押甚奇南海霍尚書韜見而稱之引爲交友謁選判霸州馬政視州篆半載時大旱被髮跣而禱徧走閭閻婦孺見其勤爲涕下以清惠名出其守御史嘗以微過辱之及還入朝而羣奄多霸人聞其父老爭言公廉潔愛

人而被辱民間囂然於是伺其入環詈罵之曰盲御史扶我父母御史不勝恚益使人訶刺公冀持得陰事快擊之訶者入解中見土牀藉葦上委敝裘而已於是又騰書薦公滿考遂得貤封父母如其官州縣佐之獲封近世所未有也已遷高陽知縣以疾請罷罷還無餘貲兩境皆立祠祀之公中歲絕慾恬素若世居士書行艸尤善晚更適美比於米南宮弟訥

二洲公諱訥字世仁才韻迴拔以儒士應試故事

試者皆脫冠披襟檢括而入公謂非待士禮遽棄牘還與隱士王莖輩爲詩友酣咏自娛縱游山水中遂精青鳥之術所懸記後多驗者晚歲慕神仙家言嘗入山學辟穀導引久而無所得歎曰非學仙難死心爲難耳善繪梅鼓琴好談論無事輒埽地而坐宗中言文學者推高陽公兄弟

施秉公諱詩字世興號湖東行十爲邑廩生六舉不利副貢者試文僞幾奪之力自陳讓乃不果代後以次舉知貴州施秉縣地雜民苗公柔以本政誨導循循然無幾何有弛弩負鉏者在邑八年多善政以母老乞歸就養十餘歲母卒家貧而喪禮甚備能爲歌詩喜讀書臨沒猶手帙不置云

狷齋公諱設娶上虞百官陳氏父騰邑庠生也十六來歸十九而寡矢志不移其伯氏或利其二庭也數詬逐之貞婦益自持朝夕泣涕而已服終歸寧父母憐女少陰謀更醮之行有日矣或

以告貞婦夜起與其婢桂私結構著男子衣渡江亟走質明其家始覺追之及於東關鑄諭百端終不聽泣曰吾得從地下願畢矣自投於河父兄亟援之相抱持而泣哀動市人相與送之歸宗黨無少長無不感歎者越五年嗣子廷文殤孺人慤悼成疾以死年二十九耳文弟廷武嗣後族人重其節因遷葬稷山祖墓之側題曰節孝陳孺人墓

方塘府君諱試字世譽爲諸生七舉不利嘉靖某年領鄉貢授鎮江府儒學訓導居半歲卒於官府君爲人坦中朗識知命樂天善歌詩好擊鼓雖廚突時冷而歌鼓之聲彌酣事親黽勉有無弟妹婚嫁殫力營辦不私所有至析箸父債以田如干不受也頽白弄孫而娛侍母側如嬰兒嬉人或面嫚詈恬如不聞其人退而愧恨叩門謝過再拜乃去與族兄東洲公以襟度相許交好無間其官潤州惟先君以愛從先君晚歲每疾病必呼府君泊馬淑人也淑人名家子柔和

敏慧通書史暗誦語孟嘗擁絮口授諸孫先君少從臥起每言吾兒必奇貴吾老不見耳因誦曰樹欲靜而風不休子欲養而親不在誦已泣然生平鄣面出入見人嗔發自引藏匿後府君逾年而沒萬曆初先宮保三品秩滿贈府君工部右侍郎馬爲淑人

敬齋公諱諱字世恭爲掾以廉貧知於上至推廩給之尉萬載有群盜入縣廨公出禦被執已識之曰此陶南衡仁父也毋犯遂得縱還旣而大亡庫金且得譴父老相告曰不可累吾 父爭先輸補之得民如此介菴公晚歲以剛直被訟門戶衰替公與昆弟處分羸共訕配李以柔和佐之由是從子輩得肆力誦習以與其宗公之功也

東橋公諱天澤字履夫端重寡言笑爲塾師以善誘稱族之顯者多出其門

對洲公諱天俊字定夫以國子生入貲爲經衛經歷未仕卒公端敏有爲陶氏之有大宗祠公所

營創也

柳州公諱師文字仁夫號未齋少善誦能文弱冠游邑庠入補國子生中應天鄉試授碭山知縣時河溢民不聊生公下令緩征禁富家勿索私負民賴少甦邑故多盜先時捕盜者不時得賞而羈證曠日故多不發覺盜以益熾公信令厚購人爲盡力得盜魁十餘人四境肅然每斂民以先後輸受賞罰聞引善通數人者賚賜之咸頓首曰願受公杖賞乃痛於杖我數月邑大治

喪歸服闋補鉛山鉛多巨室公一繩以法有商程瑤道經鉛時邑有盜殺人并誣執瑤坐罪久不白同逮數人皆瘐死獨瑤存公心寬之榜曰能白瑤者予重賞果得誠證以釋有富室殺人以賄免罪公爭之力卒如比御史稱曰此江右第一令也然以不便巨室爲所擠改教淮安遷知宐都地偏政濁徵斂無藝每丁石輸至十金民不能堪公躬自菲薄條梳事櫛曠然一洗其陋額成纔什一而已屯軍奪民田糧存民戶仍

習久莫敢問公爲疏請諸朝還民田千餘頃
尤注意學校增贍士田畝八百建社學四鄉創
清江書院於學宮傍邑陋士無師授資遣諸生
鄭遇春輩受學於石首宦士久無舉者已酉所
遣生遇春卽雋於鄉方繕孔子廟庀木有文楠
數株浮江來人共異之鎮筵之役藩司檄諸邑
買粟餉師期會甚棘旁邑駭擾公令邑人均售
粟更告糴稔地終借公儲以紓之民不病而轉
輸獨先俗娶婦多長於男十餘歲待年夫家號

曰同養婦外奔內亂風習淫昏乃下令俾有女
者自訴齒不相當者渝其約聞邑中有貞婦躬
造廬致禮俗用大改民建祠祀焉公涖官如治
家諸廢具興而民不知役遷柳州同知五月矣
猶管辦民事溝塍米鹽緒未竟者皆趣成之細
至新令廨宇什器咸躬爲省成又種竹於庭爲
詩自解其急公勤民如此旣歸歎曰六十翁走
瘴鄉徇祿何爲哉遂棄牒不仕居數月疾作卒
公嘗言吾游南雍侍湛先生於觀光館先生教

以勿欺時諸生齒侍吾不隱年坐先諸友先生
云子誠不欺者卽此是學也後仕更數邑行有
不得輒恃此無恐蓋其政事有所本云

應山公諱師賢字尚甫生而凝默有遠器莊敏公
戊肅州也以帑行謀所以存後者公獨留居瑾
誅莊敏自戊所還復起柄用在官又方介遠嫌
諸子皆不得從公不勝思慕間數歲持去來資
造視起居已乃辭去出門無知者侍父疾不解
帶執喪甚哀事繼母楊以孝敬稱文僖之官吏

局公亦謁選授鴻臚寺序班遷寺主簿寺堂屬
員衆俸給咸總於簿故事入俸者石加耗米比
支給諸胥徒多取餘焉公清嚴人不得入取顆
粒減加耗遂以爲常請急歸三年復還其官居
數月解綬封翰林院編修年六十五卒後贈通
議大夫詹事府詹事兼翰林院侍讀學士又以
長子左布政秩滿贈如其官公質表寬中胸無
留言所至稱長者爲諸生時莊敏已開府二廣
然出無僕從每握粟立津道呼舫寄載行詣郡

郭後雖貴猶逡巡避人嘗舟行觸他舟他舟人
扶其從者曰若不識陶封君舟而犯我邪塗有
識公者訶曰此非封君哉他舟大慚公微喙而
已嘗謂管人有言欲知來世因今生作者是吾
謂人於子孫然耳凡今所受祖宗所作也今所
作子孫所受也

百湖公諱師齊字廉夫材局英敏弱冠代父榷家
政以辦稱父病癰潰吮之旬日愈人謂孝感居
平退讓無校嘗曰吾母茅孺人有言與人俱十
九忤意能善處之者惟柔道乎與弟友愛推舊
居居之曰母志也從伯高陽公爲作百湖孝友
詩美之士大夫多以詩贈嘗就養吉州逾月卽
戒行子大年固留之公曰汝祖母在堂何忍留
此甲子孫允光魁於浙公猶及見焉

中洲公諱師道字弘夫孝友醇誠與物無迕以歲
薦授袁州府學訓導嘉靖末籍嚴氏貲公亦被
委金寶狼藉諸同事爭捃取之廉從懷袖皆滿
公驚走歎曰此盜貲也把握之物皆無所染監

者見而異焉擢爲武昌府學教授至楚謝諸生
修羊資其貧者恩義甚篤三年終於官諸生悲
慕之爲立像樹碑於廟側

雲溪公諱師伋字述夫性孝友勇於徇義嘗父疾
刲股或聞而譽之愕曰奚有是輒泣然善事繼
母弟爲新昌掾母視之病劇臥廨中公聞馳往
奉事不解冠履者數旬面垢形槁神慮變惛新
昌令聞而禮焉歎曰世乃有事繼母如陶君者
乎爲邑庠生以例入大學晚就廣東四會丞邑
粵而不雨公往誠禱乃澍囚數十人反獄中賴
公以定翼日訊囚罪創謀者數人而已二者皆
代令受名也居七歲致仕歸嘗以父母蚤世不
及祿推遺諸弟前後凡千金至析箸復讓先產
至今稱爲長者

雙溪公諱師純以掾滿考需選卒配郡城王氏王
之新寡郡貴人聞其賢求娶焉人謂之曰一日
羞易忍耳而終身富貴王曰吾惟不忍一日之
羞故不爲也先君子重其志哀其貧請爲女師

使二姊事焉性剛難忤而慈愛人予痘時瀕死
賴保持以活卒年八十四

湖西公諱廷桂字秀夫少而工醫人未有知者嘗
之外家有病瘕癰者晝夜震掉老醫師數輩投
療無損相視憂駭公聞自榜能治及至診視衆
師固已少之出又大言曰飲吾藥及盂未燥愈
耳乃攘袂於衆前爲劑劑成而故廋其奇要藥
弗投衆師皆嘻曰藥如是固潰盎溢釜矣公請
曰若燎藥違法請自燎燎時乃竊入廋者盡飲

掉者帖臥衆師愧服引去而公名聞於一郡

若谷公諱廷宣字旬夫邑庠生介石公繼子也而
屢爲所後言請置娣妾圖似續卒舉弟廷霖人
稱其不私負性固窮與先君友善晚益貧困先
君遺以短褐大布義不受也

庸齋府君諱廷奎字應夫方塘府君長子生而嚴
重髫年卽嗜學笑語坐立皆有度性至孝侍祖
父側閭閻唯謹弱冠補庠生以選入稽山書院
累舉不第非其志也嘗謂今科舉學絕根掇華

風習日陋奮然思起墜緒稟仰聖修精思而力行之其宗斷自洛閩以爲舍是皆斜徑熾道不足蹈也當是時文成王公起里中以所學倡召海內士爭趨走之其指簡易徑直所解書義或謬於紫陽府君心不謂善也文成之前嶺南有湛甘泉先生婺有章楓山先生而章先生尤用行履醇緻稱府君獨心師之嘗言予賦性朴愚稍知向裏鑽堅極深久而有會於日用事物之交天理人慾同行異情之際亦嘗審辨於中以自驗其心之所安與行之所向有在此不在彼者使楓山可作願負墻而請焉其趨尚槩如此又言姚江言致知嶺南談體認其流將使學者釋成法信胸臆害有甚於膠固拘瑣者於是著書數萬言於知行博約之類皆嚴析而精論之名其書曰正學演說又爲易經筆意若干卷別爲圖像圖學太極理性命正中易變易教占法十翼若干篇名曰要義又嘗著論謂小學之教不立害且子不孝弟不悌幼不讓而爲父兄者

殆不能安於子弟使子弟爲父兄時而又
不以教則其不安於子弟亦如彼父兄之
不安於彼也然則小學之教乃父兄所爲
自安之計而亦貽安於世世之道也謂
教始閨閣先女貞倣朱子小學作女教
若干卷臚其目曰子道婦道母道凡三篇
師資廢交義薄爲作朋友論論者謂陶公
著書如紀行足踐目親而言之異乎坐談
瀛裨者矣生平坐無倚立無跛行無翔割
方而食酌清而飲貌必衷言必復人有過
面而質之

後無餘辭與人居以禮雍雍如也嘗有客
在座小交其足府君正色言曰小交則小
不敬大交則大不敬客遽起謝子孫侍立
移時足痺膝攣不敢傾搖不命去不敢去
也事親盡力喪盡哀與二弟友愛白首猶
共居爨晚歲惟季叔存每食有魚肉必問
十三公供未對曰未也卽徹奉之後膳魚
肉者必先十三公也嘉靖戊申貢於禮部
某年授武學訓導癸丑拜疏請老奉旨致
仕又明年先君致仕秩滿一封如子官進
封

中憲大夫徽州知府復以季父 恩贈福建按察司副使先君考三品加贈通議大夫工部右侍郎卒年八十有一府君嗜學好古老而彌篤晚歲臂掉指強然日起抽管著書未嘗少輟先沒二日猶藁成數紙其勤如此沒時有光上屬於天鄰人望之以爲火弟廷進

休寧公諱廷進字正夫學者稱衍齋先生行醇古治經邃理爲一郡宿師所授弟子多顯貴而公八舉不售嘗慨然著論以爲功名利於少壯進

修急於暮齒乃置籍爲日格曰省躬私鑑日所酬酢夕輒記之序略曰古人書動史官告忱上帝咸藉資人天還自警惕若予手書祕笈兩史具存上帝臨女吾以筆告之矣其格有云某日接人無失居處無苟而門墻空虛我心不快不知有愠卽是私意又云某日心緒欠寧要是私意所擾其檢身不及率類此公生平尤明於易綴文成圖系之以說若外書科疏然學者咸服其精簡嘉靖戊午貢禮部部試第一授休寧縣

訓導某年卒於官年六十二自吾高曾而下以
孝友傳世兄弟均財家無私藏方塘府君之世
薦丁不造外戢閔侮內訓諸姪家以復昌公之
力爲多奔父喪京口途遇盜接而禮之詞貌間
暇加以柴毀盜感動舍去鄉人言庸齋公之方
嚴衍齋公之和雅皆所謂慥慥躬行君子也
樸齋公諱廷佑字吉夫庸齋府君從弟少英爽伉
爭喜誦讀善書行楷有二王法舉鄉飲賓人謂
之德選

貞齋公諱廷佑字吉夫庸齋府君從弟少英爽伉
直授醫於族兄湖西公通內難大旨療治多奇
中尚義輕財其拯療貧弱積粗升斗或無一錢
途遇之囁嚅不敢復請公召曰顧汝家病差否
耳吾無愛也公旣用不貪名請藥紛然酬報者
日益稀少晚年家愈貧質衣市藥意未嘗怠見
人有疵過或用他醫敗事每面責數之聲色俱
厲然中懷愛人人未嘗怨所入貲與兄弟均衣
食無有彼我公始無子年五十餘生子二人老

而抱孫焉

省吾公諱一貫字唯卿行楠四性至孝母丁年九十老病委頓公奉事數月衣帶不解蟣蝨若垂穗時七十餘矣母沒號痛距四日而卒人信其孝

會淵公諱一鵬字南卿補庠生屢應鄉試性行明劉族譜自河濱公及謝山人踵修之後統緒未竟公討究漏軼釐改訛誤佩毫執卷家詢戶叩行字婚葬之屬賴以傳信焉

憲副公諱大有字子謙號同野嘉靖癸卯與先公偕領鄉薦甲辰成進士授刑部主事丁內外艱起補郎中時嚴氏柄國獄吏望風爲武健公性寬仁意嫉之著子產鑄刑書論以風焉出守廣州廣地饒多盜公至下令湔洗而糾察令丞以下贓罪白去之減繇省刑問疾苦數月大治初戶口逃亡責逋於賦長民大困公出贖金七千七百代償之廣地卑濕繫囚多病死爲施木棧於獄所活甚衆番禺南海郵傳煩官歲募夫而

勢家多以奴冒直比徵發皆匿去急仍徭民公
乃更募丁壯置牌驗爲保伍以次踐更徭返有
稽民不苦役歲羨站銀二千市舶司病商商舶
壅公間往蒞之稅清人歡萬貨畢集公私賴焉
時 詔令郡縣積穀以多寡殿最守以下公謂
斂民積怨不及格而止明年擢山西按察司副
使飭兵潞安時盜出沒太行公至募驍騎推勇
者爲率指授方略使詰盜悉得盜魁秋備鴈門
親行塞外日馳百餘里壁燧修明虜不敢入竟

以前守廣時積穀不如制奪官歸公性恬曠襟
韻蕭然好飲酒善談諧喜爲歌詩吟咏不輟人
或索其艸笑曰吾籟鳴耳配董安人明慧慈祥
五子皆天資長厚兄弟友愛通財共甘時會飲
盡數斗罌歡言無間至今其子孫有雍睦之風
都憲公諱大順字景熙號雲谷行德二十四少從
祖莊敏公官京師係籍三河年二十一舉順天
鄉試第九時南士竝占籍舉者凡九人北士大
謹俱罷還充本縣廩膳生每試多冠同舍生視

所願盼攜手輒起名價四方生徒多負篋從之
復以嘉靖戊午舉春秋經第一乙丑偕其子允
淳舉禮部鄉試再薦與父子同榜進士皆世所
稀絕也授工部都水主事以父老移疾歸養終
服起補武選遷職方員外郎當事者以爲材一
歲中更長三司還爲職方郎中時北虜初款塞
奏牒紛沓公條覆當指款益堅精簡將帥而痛
繩其有中助者始得大璫皆駭憾旣察公無私
更相歎服再用邊功 賜金進俸一級又次當

遷列卿以弟沒力請外補遷大名道兵備副使
再改湖廣久之遷山東糧儲道叅政會裁冗員
官在裁中歸居四年復補湖廣明年遷福建按
察使轉右布政使遂爲左秩滿之明年擢都察
院右副都御史巡撫廣西無何坐言者致仕公
沉練有裁識事至輒了時捕亡人曾光甚急或
縛人以告曰光也額瘧應圖公笑曰光也額不
復瘧矣釋而遣之楚宣慰司人扞捕以叛逆聞
二十七人皆斬於市公至市會決深明其冤御

史色動曰業奉 詔奈何乃殺一人餘皆獲免
其明恕善斷率類此居楚口遣吏江行遇盜視
所持牒遽曰此陶公使不可犯舍之其得人心
類然也長閩藩六歲囊無餘貲嘗謂諸子曰吾
意欲爾等貧以爲更勝於富性好玄理經月宴
坐嘗內見腑臟晝觀星緯生平慕白居易之爲
人手寫其閒適詩以自況焉年七十四卒訃聞
賜祭葬如例配朱夫人性婉而孝事姑恭謹夫
人餘姚御史演女也公釋時適外家諸公識之
嘆曰此陶氏駒也以二幣盟之曰吾有女願以
相託歸語其家咸怪其率易後貴顯人皆稱服
焉

文僖公諱大臨字虞臣號念齋行德三十二少厲
志節十五入邑庠嘗獨臥書舍鄰之少婦奔公
三公三却之巴西舉鄉試解山陰富人之寃獄
其人暮以金謝力辭之倭寇浙東畫戰守策白
之有司寇賴以平丙辰廷對第一甲第二授翰
林院編脩醞藉沈淡終日不輕出一言至於同

好私論世故往往憂憤泣下仙居吳公時來疏
論執政公所定也母卒執喪柴毀竟三年不入
內起復還故職充重錄大典校錄官丁卯居父
憂尋以校錄勞遷侍讀召纂修世廟實錄校
文應天還遷侍讀學士視治院篆踰年升南京
國子祭酒遷少詹事侍上講讀於東宮尋以
詹事掌翰林院事上踐阼遷禮部侍郎充經
筵日講官穆廟實錄副總裁公自念得再侍旃
廈上方冲年務積精意默諭潛導先講日齋

居定氣如對神明及進講儀度閒雅詞吐和亮

上每爲動容傾聽又偕同官輯帝鑑圖說上

之賜白金文綺改吏部侍郎明年大計吏存滯
節去儼材其始違衆獨持旣榜示輿論僉允

賜服至一品賞賚甚渥中外倚爲輔相忽遭疾
卒年四十有八公至性過人季弟病公憂瘁形
於色爲文告神請減筭以代視諸姪如子撫諸
孤寡恩意周至友人朱泰家貧事親孝死無後
其妻復守節死公爲治喪養其父母以坊金營

節孝祠祀之買田供祭嘗稱曰人才能難強獨
操守可以免爲故於取予尤難韓淑人之喪都
督陸公遺公美材公歸之直旣出都陸令校友
直而戒曰不受毋返公不得已納之及還京師
陸已卒爲文祭奠下歸金於子具言其詳繼以
信誓其不以幽顯二心皆此類也平生嗜善樂
獎與明而不苛獨行而不傲故鮮有忌毀者計
聞 上命中使視殮及報命 上問家事云何
對曰涼甚故事中使至喪家皆有酬幣併以狀

聞 上曰臨家旣涼胡不反之給驛歸其喪錄
一子蔭贈禮部尚書謚文僖

鑑圖公諱大恒字常卿行德三十九以例爲太學
生性樂施捨所居地甚儉割爲周行又造舟爲
渡歲儉粥饑施楫無虛日性機敏通醫方療法
有新意什器匠心事省功倍二兄居華要未嘗
投一刺郡邑強見之卽避走其操如此

大叅公諱大年字長卿號新岑行德十二弱不好
弄爲諸生以春秋菘有聲藝林間庚子薦於鄉

辛丑擢進士時 詔選庶常貴溪客或誘說公
曰從吾選可得也公笑謝之授南京兵部武庫
司主事提督武學陞車駕司郎中南京貢船千
艘艘擇衛士領之往往破產每更審規避百方
公先期密咨羸詘閉門獨裁事竣榜示翕然稱
平舊制擇富民爲馬戶至輸馬驗視常更數曹
胥徒徵索曹多費廣以給士士復需求例錢不
稱則妄言馬羸駑責以更換賠累甚苦公具白
尚書移文諸曹勿妄異同又令營將赴部同驗
以杜告換著爲令是後馬戶不稱困矣出守吉
安却私餽罷行戶衙舍如水四載轉山東海道
副使時盜賊充斥乃修保甲之法簡卒千人閱
練之踰年爲勁兵楊施仁創亂青土省門晝閉
以兵破之施仁夜遁餘黨解去事聞陞俸一級
俄以原官改福建是時倭寇躡閩督臣請增
設憲使一員專海事而舉閑住副使茅坤熟兵
可兵疏下吏部部言卽用坤則銓柄外奪非政
體請移山東海道副使某於閩時軍府艸創漳

福袁千里賊船出沒與督府畫地而守公守福寧寇逼壘相距累月去攻連江後發兵援擊多有斬捕賊遁去已與督府更守地而福寧在督府轄中後失事乃委公自解遂奪一秩明年改四川叅議時三殿燬取材巴蜀使者相望公親涉大渡河身勞苦之轉廣西按察副使潮寇張璉爲亂大兵聲討公攝左江以兵會之璉授首詔賜金幣轉江西叅政分守嶺北復平三巢賊用轉餉贊策功獲賞如前母喪歸哀慟骨立抵家杖而後起公在閩吉皆杜絕請托勢家多不快會災異察吏坐構者罷官公論寃之庚辰疾作公性凝重慎取予寡言笑飲酒至百觚不亂守吉州數歲覆楮不御郡人無知其能者迨遷去傾城出祖鄉大夫執學者百輩人爲之醮皆大驚性嗜書航史哀寫成帙曰讀史日抄又有竹屏偶錄聞見瑣錄宦轍私記遠游等記皆手書藏于家

河濱公諱大化字順卿行德十九以國子生任高

郵州判官倜儻好義陶氏譜創自克齋公凡數
十年無有續其緒者公以禮致王文學第而授
館焉諏訪鳩合爲書若干卷

省齋公諱大宗字翰卿行慶二廩生嗜學工文有
儒聲授經吳興以醇誠博雅推爲名師門下生
起爲名卿者數人旣久其子孫猶稱誦之不置
所入學俸殫於公家事嫡母有聞彬彬德讓君
子也

先府君諱承學字子述號泗橋行蒙八庸齋府君
次子也舉進士授中書舍人選爲南京湖廣道
御史巡下江及鳳陽倉所薦郡縣吏皆屏餽謝
絲毫無所受嘉靖間大將軍咸寧侯鸞寵於
上擅兵通虜廷臣與忤皆立被禍府君上疏力詆
其罪疏奏日

上方函珍餌賜鸞而留疏不肯下知友皆竊危之
久之報聞其明年鸞竟伏辜人謂府君疏有力
焉出知徽州府其治廉而不苛躬先訓厲以德
化爲務徽故囂訟訟輒連引歲肯投牒紛然府

君至其年訟稀俗改署前食肆皆罷群胥守廨
而已嘗江南數起大繇諸郡咸擾府君樽縮公
羨劑緩急以應之境中晏然不知有役三年遷
江西按察副使治九江會

景王之國徽當以萬人牽舟逆於江府君言千里
徵發徒痛民不如取直於徽而募民於瀕江便
從之省公私費無算始府君在郡民率爲位家
祀之及去相與生立祠歲再會歌舞羅拜祠下
寃弗直者走愬像前徽民賈四方遇越人必問

府君安否其見思慕如此國朝徽郡稱良守前
胥孫後有陶餘不及也流寇破玉山戕汪副使
府君以兵禦之湖口親督戰殲其魁江中遷湖
廣叅政福建按察使丁內外艱就起廣東按察
使以望高半歲中三遷至河南左布政使用廉
平率屬屬吏化之召爲太僕卿未幾出尹應天
歷南北大理卿工刑左右侍郎至南京禮部尚
書致仕 賜祿米歲夫卒 贈少保府君內行
醇篤居官奉職循理無私交萬曆初執政者尚

苛細而府君性寬大持議多異同終不合以去
士論高之性冲澹寡言笑終日端默於在嗜慕
泊如也生產貧薄餽粥纒纒所居樓四楹猶與
弟方伯公共之論者稱廉士多矜高刻覈惟府
君清而有度爲難能云子與齡益齡望齡更齡

祖齡

南靖君諱允寬字叔裕號栗齋行承十一憲副公
第二子也出後叔大心事所後母以孝聞由國
子生主南靖縣簿卒官

尚寶君諱允淳字懋脩號蘭渚行玄十四都憲公
長子也少英敏軼倫數歲侍莊敏莊敏爲語古
往牒記一聞輒解九歲能屬文裴遣師餘姚毛
先生敦元先生驚歎曰子非吾弟子也就童子
試三試皆第一明年以諸生試復第一人遂解
辛酉鄉額乙丑父子並捷南宮拜行人奉命
營大學士袁公葬事竣遷主客司主事歷儀制
員外郎時春官郎多天下名儁各持嗜慕爲曹
相追逐倡和於是溫陵李公載贊金華徐公用

檢言性命吳郡王公世懋言古文信州楊公時
喬言政事皆有儕友君徧遊其曹意度沉簡人
莫測所去就也已遷尚寶司丞雖徊翔清曹而
時推大受孝友謙沖自文僖而下皆器重之性
嗜書於經史騷賦諸子蒼雅靡不穿貫鍵戶終
日箋評罔倦降至鼓琴弋射分篆藁隸靡不究
習然

肯以所習示人曰是樸耳吾志所儀
時文僖居銓路都憲筦職方弟駕
君深以盛滿爲慮請假得使東

魯歸未幾文僖訃聞君哭泣哀甚遂得疾卒

鄉貢君諱與齡字德望號石堂行升四予長兄也
爲人通敏沉默身不勝衣而與人恭讓竟日無
情色對人未嘗倡語酬答簡約或終席不覺發
聲弱冠能文章然以病故不能刻苦偶一出手
雖習者不及二十二補縣生員二十七用大人
廕入國子學三十六而領應天鄉薦四十二而
死矣德望與望齡同鄉舉兩詣春官己丑予偶
與選而德望見黜然手足舞竟日居數月去不

見少愠予性疏惰望前脫後每有適輒拔足行不能省問裝橐而德望特周緻雖行數十里外必宿辦裝微至錐刀觶礪絨綫之屬畢具大人之起官汴以家屬焉時有田四十畝見米數石資具罄然而逋甚衆德望性既儉密益節縮自苦所出納寸縷一錢靡不籍者歲夜鄰家咸得列酒饌嬉笑而德望獨爲債家所窘捨地喧囂雞旣號猶不暇就寢如此者六七歲德望九歲失母母予母董夫人甚子也而每哀思王夫人時與人言雖長大未嘗不流淚被面見者感動配陳上虞應天府尹陳公絳女有賢行女時陳公篋其俸五百令藏之後數歲出以與其兄鉄兩無損其歸也予姊適諸氏衣被什器皆移給於嫂未嘗有言其舉止言論殆儒生也繼李氏儒雅不及陳柔婉過之

右族譜世傳先生於戊申秋冬間始屬筆已酉春邁太夫人之變甫百日先生復告殂故未竟厥緒姑就艸藁輯錄列之

易者集

卷之十五

四

本館藏

大菴集卷之十五



